

DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
*manè discutienda, in Scholis Medicorum, die Jovis vigesima-sexta
mensis Novembris, Anno Domini M. DCC. L.*

M. LUDOVICO-JOANNE-BAPTISTA COSNIER,
Doctore Medico, Præsede.

An præcipua, in Pulmonibus, nutrientis succi preparatio?

I.



ADUCA, fragilisque mortalium soboles, quæ tanto sui dispendio propriis sibi functionibus sufficit. Quo vivimus motu, eodem continuò morimur. Ad vitam enim moveri essentialē; hinc jugis illa partium deperditio, necessarium interitūs & ruinæ rudimentum. Diù tractata gracilescit solidissima metalli moles; quieta etiam edaci minuitur rubigine; ne mire-
ris ergò quòd ex tenerrimis machinulis conflatus homo tam

citò fatiscat. Ut igitur utriusque generis partium, quibus corpus constat, perennis explicetur avolutio, exterior & immensa ne quæratur potentia. Circuli enim vitalis actione, fluidorum nisu, valorum resistentiâ, variâque directione, necessariò fit, ut, suprâ vim cohæſionis prævalente impetūs toties repetiti momento, faciliùs dividantur fluidorum particulæ, sensimque, mox in obvios secretoriorum meatus interius excipiantur, mox patentibus ad exteriora spiraculis occurrant. Quantas autem in sese fluida, tantas & in solida vires exerere videntur. Irruentibus undequâque illorum effluviis cedit & ipsorummet ossium durities; minimis orbantur superficie suæ frustulis; cùm fluida salinis præsertim instent armata cuspidibus. Physicis itaque legibus congrua hæcce consumptio. Nonne etenim insensibilium quasi atomorum irruentium agmen, ad abraderendum tenerrimas ossium particulas tantùm valet, quantùm aqua, quæ poros funis ab appenso pondere constrictos subit, vel ipsiusmet in Alembico vapores expansi cervinum cornu penetrantes, oleis licet & salibus turgens. Ephemeræ itaque, veluti foret, totius Microcosmi vita, nisi, nutritionis operâ, perennes destructionis causæ jugiter compensarentur. Quotiescumque autem, fluidis continuo attritu imminutis & exhaustis nova similium restituetur copia, vel solidis etiam simplicissimis pares applicabuntur particulæ, tùm ambo reparari & nutrirī meritò dicentur. Plurima porrò uti sunt deperditionis, innumera sic restitutionis instrumenta. Hujus materies amplissima, chylus,

sed remota. Os, prima est illius officina; rursus in œsophago & ventriculo elaboratur. Intestinorum ope, utilioribus permiscetur succis, à deterioribus expurgatur sordibus. Atteritur dein in lacteis ordinis diversi vasis; lymphâque hîc præsertim jugiter stillante, diluitur. Sanguini tandem infunditur subalbus ille latex, sed rudis adhucdum, minusque ad nutritionis officium aptus; quippe qui *inchoativos* tantum fuit hûc usque labores perpeffus, motibusque ac pressio- nibus à subclaviâ ad cor, à corde per Pulmones, variis committendus est incerniculis. Huic autem visceri præcipua meritò tribuetur nutrientis succi præparatio, quod chylum subtilissimum, gelatinosum, humoribusque nostris analogum efficiet.

I I.

Marcell. Mal-
pigh. de ovo
incub.

SOLIDESCIT in humano corpore humor nullus, quin prius per exilissimos vasorum mæandros repetitâ periodo pluries fuerit transcolatus. Sic *in fœtu successivè attenuatur humor albuminis, donec aptus evadat fluere per omnia, minimaque Embryonis vascula*. Vasa etenim iis tantum nutriuntur, quibus penetrantur humoribus. Angustiores autem canaliculi, præ cæteris, refectione indigent, uberiori jacturâ perenniter exhausti. Exiles quippe impetui minus resistunt; habito etiam, latioris superficiei ad minimam cavitatem respectu, major fit & frequentior arietantis fluidi concursus. Tenui tandem fluido facilius cedent membranulæ vasculi; abradentur, vel saltem in ipsis desiderabitur depeditorum restitutio. At quæ fecit damna prior fluidi rivulus, alter cum fœnore refarciét, modò subtilis. Talis enim exiguis alveolis erit accommodatior. Multiplici deindè contactu, alluet nutrietque plura vasculi puncta; & quos permeabit poros, eos haud ægrè replebit. Triplici autem huicce muneri impar chylus, nisi attenuatus valdè, dilutus, fluxilitateque majori, quam putari solet, commendatus. *Levis enim humor*, ut ait Hippocrates, *homini nutrimentum est*. Hinc forsitan authorum, nec infimioris notæ, sententia, quæ spiritibus animalibus nutriendi corporis facultatem concedit. Sanctorinus imò de nutritione animali N°. XXXVI. *Sucum nervæum*, inquit, *per nerveos ductus ad singulas partes stillatim per cerebri pressionem delatum singularum partium nutrimentum esse, mihi firmiter videor posse statuere*. Hæc autem genuinæ spirituum animalium indoli dissona videtur hypothesis: Hi enim *solidissimi, tenuissimi, mobilissimi, simplicissimique nec ad ignem concrefcere, sed penitus in auras abire deprehenduntur*. Corpus enim simplicissimum non plus nutrire valet quam inconcrefcibile. Gelatinosa sit igitur nutritiva materies oportet, humoribusque & partibus corporis analogâ. Fibra quævis in gelatinam resolvitur, gelatinosis igitur tantum reparabitur. Eodem etiam Embryo vescitur latice: lymphâ scilicet tenui, subtilissimâ. Ex similibus ergò succis desumatur adulti nutritio.

Boerth. instit.
n°. 274. 275.

I I I.

Malpigh. de
pulmon. Epistol.
3.

IN pulmonibus porrò chylus efficitur subtilissimus, gelatinosus humoribusque nostris analogus. Ad id enim à naturâ comparatus videtur, qui totam eorum substantiam constituit, vasorum partim, partim vesicularum contextus. Has numero infinitas jure habueris. *Orbiculares sunt & subtilissimi membrana tenuissima processus*, communi inter se aditu, & cum ipsarum principio, bronchiali scilicet fistulâ, communicantes; quos tandem continentis membranæ juris fieri, Malpighiana comprobât assertio. Interior insuper cellulosi cujuscumque folliculi superficies, mirabili pneumonicæ, tum arteriæ, tum venæ, rete investitur, cujus ope tanquam vinculo firmantur intrâ se ac colligantur ejusmodi sinus. Nec singulo folliculo deficit talis vasculorum plexus. Racematim in unoquoque resoluta lobulo, ibique exsculpta pulmonum arteria, ordinis cujuscumque ipsi impertit vasa, anastomosibusque sub fine repetitis, cum venæ radicibus,

juxtà plurimos, init connubium. Quæ simili ordine, fabricâ, à ramis per truncos majores numero quatuor, sanguinem in sinum cordis sinistrum pleno amne exonerat. Hos inter compagis minutissimæ lobulos, nudæ, nec pauciores observantur cavitates, interstitia sunt, vel potius membranaceæ ac diaphanæ pulmonum vesiculæ, à parallelis, vel angularibus extremæ lobulorum superficiei membranæ propaginibus efformatæ; totque ipsius tum interioris, tum exterioris appendices. Talem habent interstitia hæc extensionem, qualis à lobulis in situ naturali positis relinquitur; ita ut in majoris structuræ animalibus, *mediam transversæ digiti latitudinem adæquare videantur*. Plicatilium autem hujusmodi sacculorum, vesicularumque undequaque aggeries, vasculorum tandem ubique ramificationes, pulmonem constituunt, cujus tres lobi sinistram, duo tantum dextram Thoracis cavitatem, pro parte, adimplent. Quantus igitur fiat in chylo, celeriter per pulmonem trajecto effectus, quanta accidere debeat mutatio, is facile perspiciet, qui maturius fistulosam ejus fabricam, multiplex quibus alluitur, aereorum, sanguiferorum, lymphaticorum, nerveorumve ductuum genus animadverterit, iteratas itém eorum interse complicatorum divaricationes cognoverit, fibrosæ necnon quorundam tunicæ energiam, aerisque ex omni parte pressi, vel prementis impetum, physicè perpenderit.

Idem loco mox citato.

I V.

MIRANDUM dixeris solemne illud naturæ institutum, quo in eâ parte quam peculiari dicare sibi placuit operi, apposita deprehenditur machinarum dispositio, adaptata virium applicatio. Neque enim ideò pulmo conterminus est cordi, quod quasi complectitur, nisi ut per exilissimos membranularum tubulos impetu adactus maximo sanguis, in minutissimas partes atteratur ac dividatur. Quin imò alterno fluidi gravis & elastici, in vesiculas aereas introitu & egressu, potentioribus subigi debet, tanquam pistillo, resistentiis. Explicatis enim & expansis, in aeris inspiratione, vesiculis, innumerabiles, qui mox depressi, exporriguntur sanguiferorum rami, facilior fit cruoris intropulsi, ad venam usque, transitus. In expiratione verò cum concidant elasticæ earum membranæ, tenues comprimuntur venarum radices, urgetur ab iis ad ramos sanguis, sed ægrè trajiciendus. Nunc enim per collapsum obice facto, auctâque vasorum superficie respectu fluidi, frangitur & atteritur, capillarium tenuitati, suâ divisione, accommodatur. Ex toties igitur repetitis, tum conquassatione, tum concussione, quanta fluiditas ipsi, quanta comminutio accidere debent? Qualis autem sit aeris in sanguinem pulmonalem energia, patet ex dictis. Vegetior etiam sub sicco & sereno tempore, languens & impedita sub humido, *vacua*, ut ità dicam, ac *rara* sub calidiori, de his certiore te faciet respiratio. Nec ad atterendos tantum sanguinis globulos, destinatum potentiarum harumce consortium. Intimiori ipsorum miscelæ, inutilium excretioni, beneficè providet. Revolutæ etenim in majoribus vasis illius particulæ, in ultimis horum ramificationibus divisæ, uniuntur deîn intrâ se, *homogeneitatemque* quasi adipisci debent. Sanguineas enim partes ad facilem unionem proclives esse constat. Pars rubra lapideæ licet aliquandò soliditatis æmula, fluxileque serum facillimè concreescens, fusa simul, & permixta, jam soluta magis fiunt & fluxiliora: & in eo præsertim viscere, plures ubi reperiuntur vasorum myriades, uberiorque lymphæ concursus. Lympha etenim ipsa, jam in propriis organis præparata ulteriorem ibi patitur elaborationem, fitque nutriendo aptissima. Jam enim comminuta faciliùs atteruntur, utpote quæ majorem, ratione molis offerunt superficiem. Et quidem huic sententiæ favet insufficiens sanguinis in corde dextro subactio, bronchialisque arteriæ ortus. Hæc à Ruischio, olim detecta, originem ducit à posticâ, arteriæ magnæ descendens, parte modò suprà, mo-

dó infrà intercostales ab eâdem aortâ pariter oriundas; suprâ bronchia serpit; quorum ultimas divisiones fideliter concomitatur, oculi captum fugiens. Hæc sanguinem pulmonis nutritioni peculiariter dicatum, in ipsammet ejus substantiam & tunicas effundit, easdemque in hoc viscere, ac in jecore hepatica, vices adimplet. Similis & in corde observatur dispositio, quod quidem nutritur sanguine coronariarum in pulmonibus jam præparato.

V.

ET verò non ineptè ab Halesio folia vegetabilium pulmonibus nostris fuerunt comparata. Quid enim hæc præstent ad præparandos plantarum succos, ab omnibus notum est: folia siquidem majorem succi nutrientis copiam excipiunt, quàm deindè subtilem licet, subtiliorem adhuc effingunt. Tenuissimo namque vasorum tum deferentium, tum secernentium intrâ se reptatu, latioris superficiei extensione, ductilem hanc perficiunt materiem, quæ plantis nutrimentum, fructibus conciliat maturitatem. Similis & in pulmone deprehenditur effectus, sed quantò potentior: illum etenim frequentiori longè, validiorique systolis ac diastolis motu gaudere, certum est, cùm vegetantium frondes successivo tantùm diei, noctisque, frigore vel æstu, alternam illius vix æmulari queant actionem. At inquires, non respirat in utero fœtus, crescit ille tamen, & nutritur. Fateor equidè, verùm ipsi inutilem esse fatearis respirationem; cùm præparatus tum ex utero, tum in amnio scaturiat liquor, vel per patulas venularum placentæ radices absorbendus, & funis umbilicalis ope deferendus ad Embryonem, vel in os & ventriculum, proprio pondere, immittendus. Imò vasculosa totius placentæ fabrica, nonne videtur ideò disposita ut fœtui vicarius quasi pulmo, ac temporaneus habeatur? Sic in junioribus plantarum surculis secundum longitudinem collocantur follicula, quæ successivè explicata ramorum nutritioni & extensioni saveant. Num verò celerius per pulmones sanguis excurrit quam per universum corpus? Num proindè major est in istis, quam alibi, succi nutrientis præparatio? Angustissimæ sunt in istis vasorum diametri, plura renixus momenta, difficilior idem, ac crebrior quam per alia vasa transitus, elaboratio igitur maxima. Dicent alii: plurimis defunt pulmones animalibus. Verùm ipsis vesiculas sanguineis vasis circum instructas, natura concessit, pluribus videlicet diversi generis insectis. In limace etiam utriusque sexûs particeps, peculiarem respirationem observatam à se fuisse, asserit Swamerdamius. Aerem etenim, per foramen aliquod in superiori corporis parte efformatum, admitti, pronunciat, & expelli; mirabilique corporis relaxatione, & constrictione, singularem illum respirationis modum moliri annotavit. Ex dictis autem, pulmones ad nutrimenti elaborationem imprimis conferre, quis negaverit? Cùm illos mirabili artificio constructos, plerisque animalibus natura concesserit, vel eosdem infœtu quasi otiantes, in insectis quibusdam & vegetantibus deficientes, scrupulosius compensavisse videatur.

Hales Stat.
Veget. pag. 282.

Ergò præcipua, in Pulmonibus, nutrientis succi præparatio.

DOMINI DOCTORES DISPUTATURI.

M. Joannes-Jacobus Messen-
ce.

M. Bernardus-Nicolaus Ber-
trand.

M. Gaspardus Cochon Du-
puy, Regis Consiliarius &
in Arce Maritimâ Rupifor-
tensi Anatomæ & Chirur-
giæ Professor Regius.

M. Carolus-Franciscus The-
roulde de Toulouse de Val-
lun; Eques.

M. Stephanus - Ludovicus
Geoffroy.

M. Jacobus-Albertus Hazon;

M. Anna - Carolus Lorry.

M. Dionysius Pautier de La-
Brenille.

M. Claudius - Carolus de
Jean, Scholarum Professor.

Proponebat Parisiis LUDOVICUS - PETRUS - FELIX - RENATUS
LE THIEULLIER Parisinus, Saluberrimæ Facultatis Medicinæ Parisiensis.

Baccalaureus, A. R. S. H. 1750, A SEXTA AD MERIDIEM.

Typis QUILLAU, Universitatis & Facultatis Medicinæ Typographi, 1750.